

Kalaallit Nunaanni pinerluttulerineq pillugu inatsisip aamma Kalaallit Kalaallit Nunaanni eqqartuussisarneq pillugu inatsisip allangortinneqarnissaanut missingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikkut nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuineq, kiisalu palleqqusinnginneq, sumiiffimmeeqqusinnginneq peersitaanerlu il. il.) aamma palleqqusinnginneq, sumiiffimmeeqqusinnginneq peersitaanerlu pillugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allangortinneqarnera.

Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq

Saqqummiussissut

Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq

1. Siullermeerneqarnera

Nuannaarutigalugu, aalajangiiffigisassattut siunnersuut manna Naalakkersuisut sinnerlugit saqqummiuppara.

Siunnersuut allanguutissanut pingasunut aallarniutaavoq:

1. Palleqqusinnginneq, sumiiffimmeeqqusinnginneq peersitaanerlu pillugit inatsit atuutilersinneqassasoq
2. Oqarasuaatikkut nalunaaruteqartarneq nalunaaruteqariaatsitut periarfissangussaaq
3. Qasilitsumik seqqarsaatit eqqornaveeqqutillu pinerluuteqarsimasunut inissiisarfinni pissaanermik atuisariaatsini periarfissangussapput

Naalakkersuisut persuttaasarneq akiorniarlugu periaasissaannut iliuusissatullu pilersaarutaannut, palleqqusinnginneq, sumiiffimmeeqqusinnginneq peersitaanerlu pillugit inatsit Kalaallit Nunaannut atulersussaq ilanngutissaaq. Persuttaasarneq akiorniarlugu periaasissami pingaartillugu siunertarisaq tassaavoq, inuit persuttagaasimasut isumannaatsuunissaat pisinnaatitaaffiilu qitiutillugit pingaartinnerullugit suliniutinik aallartitsinissaq. Inatsisip matuma innuttaasut persuttaannermut, ajortisaarinnermut ajuutiginnillunilu malersuinnermut illersornissaannut politiit pitsaanerumik periarfississavai.

Inuk inummut allamut attaveqarnissaanik imaluunniit inummik aalajangersimasumik malinninnissamut inerteqquteqarfiginissaannut inatsisip politiit periarfississavai. Aammattaaq erseqqarinnerusumik killilikkami inuup piffimmiinnissaa politiit

inerteqqutigisinnaavaat. Tamanna persuttagaasimasumut kinguneqarsinnaavoq, persuttaasimasup ataatsimoorluni angerlarsimaffimmit peersinneqarneranik – aamma persuttarneqarsimasoq immaqalu meeqqat angerlarsimaffimminniiginnarsinnaallutik.

Naalackersuisunut pingaarutilimmik kalerrisaarutaavoq, persuttaaneq akuersaanngikkippat, aamma persuttarneqarsimasut isumannaatsuunissaat pisinnaatitaaffiilu sallertut pingaarnerusut kalerrisaarutigissallugu

Aalajangiiffigisassatut siunnersuut aamma eqqartuussisarnermut inatsisip allanngortinneqarneranik imaqarpoq, nalunaaruteqariaatsitut nutaatut oqarasuaatikkut nalunaaruteqartarnermik atulersitsinermik. Inuk suliamut aalajangersimasumut ilaalersoq eqqartuussivinni suliap aalajangersimasup suliarineqarneranut paasissutissanik tigusaqarpat, tamanna nalunaaruteqarnermik taaneqartarpoq. Ullumikkut nalunaaruteqartarnek imatut pissuseqarluni pisarpoq, nalunaarutiginnittartoq nammineerluni inuup peqataasup adressianut orniguttarluni. Ullumikkut suliassanit ikinnerusut kinguaattoortarnissaat naatsorsuutigineqarpoq, pissutigalugu suliiani aalajangersimasuni eqqartuussivimmuit inuit orniguttussat nassaariniarneri ajornakusooramat. Nalunaaruteqariaaseq nutaaq naatsorsuutigineqarpoq eqqartuussiviit patajaallisarneranut ilapittuutaassasoq.

Kiisalu pinerluttulerineq pillugu inatsisip allanngortinneqarnerata ilalerneqarneranik aalajangiiffigisassatut siunnersuut imaqarpoq, tamatumalu kinguneraa, isertitsivinni pisaanermik atueriaatsimi qasilitsumik seqqartaatinik eqqornaveeqqutinillu atuisinnaanngorneq. Naalackersuisut isumaqarput, pisaanermik atuineq taamaallaat ajornartoorfimmi atorneqartassasoq, qanorlu annertutiginera nakkutigeqqissaarneqartariaqartoq atorneqarnerata unitsitassaajunnaarluni pinissaata pitsaaliornissaa siunertaralugu. Paarlattuanik Naalackersuisut isumaqarput, isertitsivimmiittut imminnut ajoqusernialerpata allanilluunniit ajoqusiinialerpata isertitsivinni sulisut akuliunnissamat pisariaqartunik periarfissaqartariaqartut

Taamaalilluni aalajangiiffigisassatut siunnersuut inatsimmut malittarisassanullu allanngutissanik imaqarpoq, ataatsimoorlutik inatsiseqarnikkut tunngasunut pitsannorsaatsinut ilapittuutaasinnaasunik.

Taamatut oqaaseqarlunga Naalackersuisut oqaluuserisassanngortitaat Inatsisartunut suliassanngortippara.